

ARTISTA DI MOSAIK EXTRAORDINARIO OMAIRA SILVA KIER MIRA ARTE DURADERO ROND ARUBA

Bon Dia Aruba, August 16, 2021



Hopi a sinta admir'e ta traha su banki cu paisahe di flora y fauna di na altura di Costa Linda, como parti di e Linear Park. Y pa Omaira Silva, e banki ta djis otro paso mas pa percursa cu Aruba ta bira "One mosaik Island."

Omaira Silva ta un personalidad total. Un persona yen di energia y semper cla pa stimula otro pa ta involvi cu Aruba. Como miembro di Women's Club of Aruba, Silva ta presente na y ta dirigi actividadnan na interes di comunidad. Y e actividadnan aki semper mester tin hopi ambiente y color. Pasobra Omaira ta un persona yen di ambiente y color y kier comparti e energia special aki cu Aruba.

Tabata na 1996 ora cu Omaira Silva a bay biba na Hulanda cu el a dicidi pa tuma e arte di mosaik na serio. El a haya contacto cu un grupo cu tabata haci arte cu tegel kibra, y no tabatin manera pa para Omaira. "For di prome momento cu mi a kibra e prome tegel, mi a sinti mi 'powerful,'" Silva a bisa. E tabatin hopi tegel geel pa traha cune y a crea un version di un zonnebloem riba palo. "E tabata algo chikito, pero mi a gusta hopi y mi tabata kier a sigui cu e arte."

Pero, tabata na 2000, ora cu Omaira a muda pa Mallorca, pa ta hunto cu su yiu cu tabata haci su pasantia na un hotel, cu realmente el a namora di e forma di arte aki. Particularmente despues di a sigui un curso y "mi a sinti cu esaki ta realmente ta mi cos."

Na 2004, Omaira a bolbe Aruba, a bay biba na Savaneta, y asina su mosaik Art Studio a nace. Prome cos cu el a haci ora di drenta su cas tabata bay busca tegel. Pasobra e tabata determina pa desaroya su arte. Prome e creacionnan tabata pa su propio coleccion y despues, a realisa cu nan tabata regalo ideal. Su prome arte di mosaik como regalo tabata pa un amiga, Minouche Hamers, un spiel cu un marco di mosaik. "Mi ta sigur e tine ainda."

Omaira a expone su creacionnan tambe durante diferente exhibicion, incluso durante e Caribbean Sea Jazz Festival.

Aruba Art Fair y Isidora

Pero Aruba henter a cera conoci cu Omaira e artista na 2016, cu e Aruba Art Fair. Inicialmente Silva a reuni cu tur e grupo invita pa a tende di e idea di Tito Bolivar, e mente tras di e evento di arte pa San Nicolas. Bolivar tabata conoce e artista Isidora Paz Lopez di Chile, "cu tambe tabata mi idolo." E intencion tabata pa Omaira tambe a participa na e Art Fair, pero no a tende mas di e proyecto.

E artista Isidora mientrastanto si a bin Aruba, invita pa Enrita Werleman, otro artista di mosaik. Lopez Paz a bin cu su diseño, pero tambe bou impresion cu e lo tabatin un team grandi pa yud'e cu su trabou na Aruba. "Isidora ta un artista cu ta haya 'breakdowns.' Awor mes e ta den un momento asina." YP na Juni 2016, na Aruba, Isidora tabatin mester di ayudo cu su creacion, 'Carnival Nymph' despues cu el a cuminsa traha su proyecto den su hotel na Aruba. "Mervine Kock a bisa Tito Bolivar cu ami lo por yud'e pa caba cu e proyecto." Bolivar a yama Silva y ya pa e siguiente dia, e artista a bay topa cu su idolo. E conexion tabata instantaneo y e mesun anochi, Omaira a bay busca tur su mesun material, di luz te basora, pasobra e tabata sa kico un proyecto asina ta encera. A traha cuater dia, incluso anochi riba e creacion y na fin di e di cuater dia, a bay instala e arte na San Nicolas. "Nos a logra," Silva a conta. Pero e toke final di e diseño a bin na October, un par di luna final, ora cu e artista a bolbe pa inclui e ultimo detayenan di e arte cu te ainda ta yama hopi atencion.

E colaboracion entre Isidora y Omaira a conduci na un amistad y otro colaboracion pero e biaha aki Pirmasens, Alemania, unda a invita e artista Chileno pa crea e mural di mosaik mas grandi na Rhineland. Y Omaira tabata parti di e creacion ey cu a haya hopi atencion di prensa internacional. "E tabata net prome cu e pandemia," Silva ta corda. Es mas, e tabata na December 2019, ora cu mundo tabata pendiente pa un virus na Wuhan, China. E proyecto na Alemania a sigui un trabou cu Omaira a haci su mes riba invitacion di Tito Bolivar cu ta e halanan di angel na San Nicolas. Halanan traha di cocolishi cu ta un di e artenan mas yamativo di e proyecto Aruba Art Fair. "Mi tabata bay beach tur dia pa colecta

cocolishi pa asina por a crea e halanan,” Omaira ta corda. E mes a haya asistencia di artistanan Mericano Kim Wozniak y Laura Rendlen kendenan a acepta e invitacion pa yud’e cu e proyecto. “Asina bo ta wak con artistanan ta colabora cu otro.”

Pero, e trabou di Omaira ta tur caminda na Aruba. mosaik Art Studio a produci un cantidad arte, for di cayanan na San Nicolas ten a Paseo Herencia. Pero su enfoke tabata keda e proyecto di bankinan social. “Tempo cu mi tabata biba na Hulanda, nan a cuminsa cu e proyecto pa pone bankinan asina na tur provincial na Hulanda. Ora cu mi a bay Alemania, ma bay wak e bankinan.” E proyecto Ban Mosaik, hunto cu Tito Bolivar sinembargo a keda limita debi na e pandemia.

Pero, Mota Engil encarga cu Watty Vos Boulevard a acerca Omaira Silva pa traha un mosaik social sofa na Eagle. Y e proyecto di banki di Flora y Fauna di Aruba a bira un realidad y a introduci Omaira na varios usuario di Eagle Beach cu tabatin bin wak e trabou, y e turistanan cu a keda Aruba a pesar di e pandemia. Awe e banki ta testimonio di un dedicacion di un artista cu ta kere cu mosaik lo por trece hopi mas color na Aruba. Pa bunita cu tur e pinturanan na San Nicolas ta, e solo pisa di Aruba ta afecta e verf. Pero mosaik ta keda firme y colorido.

E vision di Omaira Silva ta pa pone mas di e bankinan social di mosaik na Playa, pero crea otro tipo di instalacion cu mosaik cu diseñonan tipico di Aruba pa pone rond di e isla. E artista ta vislumbra hasta totems di mosaik cu diseño cu e prome Arubianonan mes a laga atras. Diseño unico di Aruba traha pa mannan cu ainda ta fuerte pa kibra tegel, pa asina trece mas color na Aruba.

